



For dei mange - ikkje for dei få

Bjørnafjorden SV

Kortprogram 2023 – 2027

Våre kjernesaker:

- Vi vil sikra eit godt tilbod innan helse og velferd og ikkje redusera dagens tilbod.
- Mest mogleg av kommunale oppgåver skal drivast i eigen regi med tilsette i heile og faste stillingar. Vi tar tilsette og deira arbeidsmiljø på alvor.
- Stoppeklokketyranniet må avskaffast i all kommunal verksemd.
- Vi skal halda på dei skulane og barnehagane vi har i kommunen i dag.
- SFO, skular og barnehagar må løyvast meir pengar for å auka bemanninga, betra tilrettelagde tilbod og betra støttetiltak.
- Foreldrebetaling for SFO må reduserast igjen.
- Vi jobbar mot Hordfast, heilt frå kommunenivå til Stortinget.
- Bjørnafjorden kommune skal ha ein forpliktande klimarekneskap med konkrete utsleppsmål.
- Vi skal prioritera fotgengarar, syklistar og kollektivtransport i all arealplanlegging.
- Vi lovar å handheva strandsonevernet strengt for å sikra allmenn tilgang til sjø og verna sårbar natur.

Innleiing

Bjørnafjorden SV går til val på eit program for kommunestyreperioden 2023-2027 som vil ta betre vare på innbygarane, særleg dei som treng det solidariske fellesskapet i kommunen mest.

SV vil skifta kurs og styrka vår felles velferd, slik at alle kan leva gode og trygge liv, uavhengig av økonomiske og personlege føresetnader. Vi seier nei til å kutta vidare frå eit allereie lågt tenestnivå.

For å sikra velferdstenestene lokalt og for å gje lokaldemokratiet reelt politisk handlingsrom, vil vi arbeida for auka statlege overføringar. Vi ønskjer at Stortinget reduserer skilja mellom velstående og mindre velstående kommunar. I tillegg vil Bjørnafjorden SV hindra velferdskutt og nedleggingar av skular ved å innføra eigedomsskatt med klår sosial profil.

Vår ryggmargsrefleks er å verna dei svake og hjelpa dei som treng vår hjelp. Vi arbeider for å byggja eit likestilt samfunn med små forskjellar mellom folk. Vi vil ta imot fleire menneske på flukt og systematisk kjempa mot rasisme, trakassering, diskriminering og ekskludering i heile vårt samfunn: på skular, i idretten, på bustadmarknaden og i arbeidslivet.

SV ønskjer å skapa ein miljøkommune der dei fleste kan gå eller sykla til arbeid, skule og fritidsaktivitetar og der kollektivtilbodet er eit reelt alternativ til privatbilisme.

Bjørnafjorden SV vil byggja ein betre kommune, det krev ei ny og solidarisk retning.

Helse og velferd

Bjørnafjorden SV vil ha ei godt utbygd helse- og omsorgsteneste der alle er trygge på å få den hjelpa dei treng, uavhengig av økonomien deira eller kvar i kommunen dei bur. Vi ønskjer ei sterk offentleg helseteneste som arbeider førebyggjande. Her trengst auka satsar for sosialstønad og styrka kvardagsrehabilitering. SV vil utvikla på Bjørnafjordsmodellen for fastlegane og sikra fullverdig legevakt både på Moberg og i Eikelandsosen. Dei tilsette skal ha medråderett og gode løns- og arbeidsvilkår.

Psykisk helse

Det er viktig med førebyggjande psykisk helsevern, tidleg identifisering og behandling av psykisk uhelse, og utjamning av sosiale og økonomiske forskjellar. Vi vil førebyggja psykiske helseplagar ved å auka kompetansen på psykisk helse hos både elevar og undervisningspersonale. Då treng vi psykologar i skulehelsetenesta.

Eldreomsorg

Eldre skal ha livskvalitet og verdigheit i alderdommen. Dei som får ulike fysiske og psykiske helseplagar treng gode og varierte offentlege tenester av høg kvalitet. SV ønskjer ei fleirfagleg tilnærming der ulike yrkesgrupper saman skapar ei heilskapleg teneste.

Heimetenester

I ei god og omsorgsfull heimeteneste trengst det tid til å utvikla gode relasjonar og tillit mellom dei som gjev og dei som får hjelp.

Sjukeheimar og omsorgsbustadar

Plass på sjukeheim eller omsorgsbustad må vera tilgjengeleg utan urimeleg kø og ventetid. Tilbodet må sikra dei pleietrengande god livskvalitet, og vi må vidareutvikla individuelt tilpassa avlastningstiltak for personar med demens.

Rusomsorg

Bjørnafjorden SV vil kjempa mot marginalisering og stigmatisering av rusavhengige. Alle som er rusavhengige, skal ha rett til avrusing, behandling og oppfølging. Vi ønskjer å redusera rusavhengigheit i kommunen ved forebyggjande arbeid, tilby rusfrie arenaer og fleire tiltak som integrerer dei med utfordringar knytt til rus og psykiatri i arbeidslivet.

Oppvekst

Bjørnafjorden SV vil at alle barn og unge i Bjørnafjorden kommune skal ha gode oppvekstvilkår og tilgang til gode og trygge barnehagetilbod, skule og skulefritidsordningar. SV seier nei til nedleggingar, vi vil behalda dei skulane og barnehagane vi har i dag. Alle barn og unge må få oppleva meistring, trivsel og fellesskap og få eit allsidig aktivitetstilbod knytt til lokalmiljøet. Fattigdom i barnefamiljar må førebyggjast og bøtast på i kommunen vår.

Barnehagen

Vi ønskjer ein nærbarnehage der pedagogiske leiarar har tid og rom for å gjennomføra og leia det pedagogiske arbeidet og sørge for at alle barn får eit tilrettelagt tilbod. Alle overføringar til barnehagane skal komma barna til gode.

Skulen

Vi vil ha ei skule med nok ressursar, kompetanse, lærarar og andre tilsette. Vi seier klart og tydeleg nei til kutt, nedskjeringar og dårleg skuleøkonomi. Bjørnafjorden SV vil skapa ei skule basert på tillit til lærarane si kompetanse. Vi treng fleire og kvalifiserte lærarar og eit styrka lag rundt lærarane med fagressursar på barn og unge.

For Bjørnafjorden er det ei styrke at våre ungdommar har 3 gode vidaregåande skular å velja mellom, desse vil SV jobba for å behalda.

Skulefritidsordninga (SFO)

SFO er ein stor del av det sosiale livet for mange barn og bør vera heilt gratis i heile opningstida. SV seier nei til auka i foreldrebetaling. På sikt vil vi at SFO blir ein del av skuledagen. SV vil ha betre bemanning med fleire kvalifiserte tilsette på SFO.

Barnevern

Barnevernet må sikrast dei ressursane som trengs for at barn og unge i Bjørnafjorden skal få nødvendig hjelp og omsorg til rett tid. Eit solid og kompetent barnevern er viktig både for det enkelte barnet og i kampen mot auka sosiale forskjellar. SV vil sikra at tilsette i barnevernet har tid nok til fagleg utvikling og systematisk rettleiing.

Samfunnsutvikling

Næring

Bjørnafjorden SV ønskjer ei grøn og berekraftig næringsutvikling med vekt på å utvikla arbeidsplassar der folk bur. Vi vil utnytta dei strategisk viktige næringsområda i kommunen på ein grøn og berekraftig måte. Gründerar og små og mellomstore bedrifter er ryggrada i eit attraktiv og levande lokalsamfunn. Derfor vil vi sikra gunstige og føreseielege vilkår for bedrifter som skal etablera seg og gro i kommunen. Vi vil ha verksemdar som tek arbeidstakarrettar og arbeidsmiljø på alvor.

Transport

Vi vil ha betre vedlikehald av kommunale vegar, gul stripe og trygge bruksvegar i heile Bjørnafjorden. SV vil arbeida for eit betre kollektivtilbodet både mot Bergen og ut i krinsane i heile kommunen, blant anna ved at det gjeninnførast direktebuss til Haukeland Sjukehus og at heile kommunen kjem inn i takstsone A for kollektivtrafikk.

SV vil gjera det lettare å leva miljøvenlege liv og kunna sykla, gå og reisa kollektivt i kvardagen. Vi vil tryggja mjuke trafikantar ved å betra gang- og sykkelvegnettet i kommunen. Vi vil ha eit delvis bilfritt Osøyro sentrum.

Landbruk

Matproduksjon må prioriterast. Bjørnafjorden SV meiner at omdisponering av matjord og landbruksareal til andre formål som grunnregel ikkje skal skje. Småskalalandbruk og kortreist- og økologisk matproduksjon må sikrast gode vilkår.

Bustad

Utviklinga i Bjørnafjorden kommune må byggja på ein heilskapleg plan som sikrar samfunnsmessige omsyn. Det handlar mellom anna om å ta omsyn til estetikk og bukvalitet, og å sørgja for ei variert samansetting av bustadtypar. Vi må kjempa mot press frå utbyggjarar som vil bygga både bustadar og næring på eller ved dyrka mark, eller i strandsona og anna verdifullt areal tett på naturen. SV vil prioritera byggeprosjekt som tek miljøomsyn og legg til rette for gode liv og god folkehelse. Vi vil gjera tiltak for å leggja til rette for vekst i område som slit med fråflytting, men der infrastruktur som t.d. skule og barnehage er på plass.

Klima og miljø

Bjørnafjorden SV ønskjer ein meir aktiv og solidarisk miljøpolitikk. Vi treng eit forpliktande klimarekneskap med konkrete utsleppsmål for Bjørnafjorden kommune. SV vil alltid prioritera natur og folks helse framfor retten til å forureina, og vi vil gjera det lettare for innbyggjarane å leva miljøvenlege liv.

Det beste vi kan gjera for å redusera miljøbelastninga ved energiproduksjon, er å redusera energibruken så mykje som mogleg. Her må stillast krav om energieffektivisering og fornybar energiproduksjon ved kommunale nybygg og renoveringar.

SV jobbar mot E39-Hordfast, heilt frå kommunenivå til Stortinget. Vi vil ha ei bru som bind kommunedelane tettare saman, men ikkje monsterbru over Bjørnefjorden.

Kommunen må kartlegga ras- og flaumfare i heile kommunen og ta omsyn til risikoen ved bygging i område som er utsette for ras, flaum eller havnivåstiging. Vi vil setja i verk sikringstiltak der bygg og struktur er i faresona.

Arbeidslivspolitik i kommunen

Kommunen må jobba målretta for å ta arbeidstakarane sine grunnleggjande rettar og interesser på alvor, leggja til rette for fagleg og personleg utvikling, og tilby heile og faste stillingar. Vi ser på fagrørsla og dei tillitsvalde som medspelarar og ønsker eit tett samarbeid for å sikra tilsette i kommunen medverknad og reell medråderett i eigen arbeidskvardag.

Bjørnafjorden SV seier nei til privatisering og konkurranseutsetjing av kommunale tenester! Vi vil redusera bruken av midlertidige stillingar og vikarar til eit minimum gjennom å auka grunnbemanninga. Felles kommunal bemanningsteneste bør utvidast med fleire tilsette i heile, faste stillingar, samtidig som vi arbeidar for å avvikla bruk av kommersielle bemanningstenester på sikt.

Demokrati, openheit og tillit

Bjørnafjorden SV ønskjer å styrka folkemakta gjennom eit ope demokrati der innbyggerar og grasrotorganisasjonar blir høyrde og har innverknad. Då må vi sikra openheit i all sakshandsaming og reelle moglegheiter til offentleg debatt før vedtak. Kommunen skal involvera innbyggerane aktivt i utviklinga av eige nærmiljø, mellom anna med sms- eller e-post-varsling til innbyggerane om sakar som er viktige i deira nærmiljø, og informasjon om korleis dei kan påverka.

Demokrati på arbeidsplassen er ein viktig del av den norske arbeidslivsmodellen. Gode kommunale tenester får vi når dei tilsette får fagleg fridom, nok tid og tillit. Gjennom samarbeid med fagforeiningar og brukarorganisasjonar vil SV sikre meir makt og fridom til dei som jobbar for, og dei som er treng, fellesskapet.

Kultur

Kunst og kultur er avgjerande for livskvaliteten og folkehelsa vår og for å sikra eit levande og kritisk offentleg ordskifte. Det er nødvendig med ein aktiv kommunal kulturpolitikk som sikrar alle barn og unge tilgang til gode kultur- og fritidsaktivitetar. SV ønskjer fleire og billegare elevplassar i kulturskulen og vil støtta lag og organisasjonar med prioritering av tiltak som stimulerer skapande eigenaktivitet. Vi vil styrka biblioteka som kunnskapsbase, debattarena og møteplass og nytta biblioteka for å forebygga digitalt utanforskap.

Bjørnafjorden SV vil gje kunstnarar og kulturarbeidarar betre og meir føreseielege arbeidsvilkår, og sikra gode økonomiske rammar og ubyråkratiske stønadsordningar for det frivillige kulturlivet.

Støtt SV i kampen for ein ny kurs og ein betre kommune:
www.sv.no/bli-medlem/